

夜

航

船

夜航船卷之四

古劍陶菴老人綉

攷古部

姓氏

倉頡姓侯剛氏見古篆文註。許由字武仲見莊子釋

文。堯姓伊祁少昊名摯字青陽帝嚳名彥成湯字

高密見帝王世紀。臯陶字庭堅孤竹君姓墨名台

見孔叢子註。伯夷名允一名元字公信叔齊名智

字公達見論語疏。中子名仲達見周書詩史註。彭

祖姓錢音義名鏗見論語疏。其子胥餘見莊子司

馬彪註。老子父名乾字元果見前涼錄。老子初生

時名互祿見五妙內品。管叔名度見史記註。易

牙名亞見孔穎達疏。逢蒙之名弟名鴻超揚朱之

弟名布見列子。伯樂姓孫名陽師曠字子野見莊

子疏。君陳為周公之子伯禽之弟周書有君陳篇

見坊記註。鬼谷子姓王名詡河南府人見姓氏考

。公孫弘字次卿見鄒長倩書。杜康字仲寧見魏

武短歌行註孟軻字子輿見漢書并孔叢子又字子

居見聖證論莊周字休見列子註。孫叔敖名饒見

孫叔敖碑。計然一名研一名倪又姓辛字子文見

史記索隱。文種字子禽見吳越春秋陳仲子字子

終見皇甫謐高士傳。漢高祖父太公名尚見後漢

書注 又名煜字執嘉見帝王世紀。昭靈后名含高

祖兄仲名喜曾參字敬伯申公名培見史記註。項

伯名纏字伯見漢書註。叔孫通名何見楚漢春秋

。壺關三老姓令胡名茂見荀悅漢紀。楊王孫名

貴見西京雜記。攸非亦名荆軻見續博物志。伏

生名勝字子賤見西漢碑。文翁名黨字仲翁見張

崇文歷代小記。張宗字諸君杜茂字諸公見陳忠

傳註。楊子雲所稱李士元者名弘見蜀秦安傳。

鄭子真名樸嚴君平名遵見王貢兩龔傳註。施延字

君子見後漢書注。田生字子春見楚漢春秋。侯芭

字舖見論衡子。丁公名固見楚漢春秋。衛夫人

名錄字茂漪見翰墨志。綠珠姓梁白州人見綠珠小傳。呂安字仲悌居苗姓應瑒從弟俱見文選註。花卿名驚定見舊唐書僧一行姓張名遂見續博物志。竇滔字連波見武后記。神和子姓屈突名無為字無不為張詠布衣時遇之見張詠傳。失馬塞翁姓李見高谷詩序。

辨疑

禹陵 大禹東巡崩於會稽現存陵寢豈有差訛且史載夏啓封其少子無餘於會稽號曰於越以奉禹祀則又確確可據今楊升菴爭禹穴在四川則荒誕極矣升菴言石泉縣之石紐村石穴深杳人跡不到得石碑有禹穴二字乃李白所書取以為証蓋大禹生於四川所言禹穴者生禹之穴非葬禹之穴也此言可辨千古之疑

甘羅十二為丞相古今大誤史記云甘羅事呂不韋秦欲使張唐使燕唐不肯行羅說而行之乃使羅於趙趙王郊迎割五城以事秦羅還報秦封為上卿不魯

為丞相相秦者是甘羅之祖甘茂封羅後遂以茂之

田宅賜之

共和 幽王既亡有共伯和者攝行天子事非二相共

和也 見姓氏考

子產字子美 見左傳註東坡放魚詩不怕校人欺子美

註者疑是杜少陵則誤矣

蒙正住破窰 呂蒙正父龜圖與其母不合并蒙正逐
之貧甚投跡龍門寺僧鑿山竈為龕以居今傳竒謂
同妻住破窰殊為可笑

日落九鳥 烏最難射一日而落九鳥言羿之善射也
後以為羿射落九日非是

漢壽在四川保寧府廣元縣漢封關公為漢壽亭侯漢壽邑名亭侯爵名後人稱壽亭侯者誤

五大夫松 秦始皇登泰山風雨暴至避於松樹之下封其樹為五大夫五大夫秦官第九爵今人有誤為五株松者非也

夏國 揚州漕河東岸有墓表題曰夏國國公墓道夏音度與夏字相類少一發筆下作又行人遂誤為夏國公蓋明顧公王之封號賜地葬此也

飯後鐘 王播字明敏少孤貧客游揚之木蘭院寄食僧齋僧頗厭薄乃齋罷而後擊鐘播怒題詩於壁今以為呂蒙正事則非也

馬前覆水 太公望妻馬氏棄夫而去後見太公富貴

求歸命收覆水今指為朱買臣非

女兒鄉 吳敗越句踐與夫人入吳至此產女而名今
誤傳范蠡進西施於吳與之通而生女殊為可笑

析類

有同時同姓名者兩曾參一曾參殺人而致曾子之母
投杼兩毛遂一毛遂墮井而致平原君之痛哭

異世則兩魯秋胡列國一魯秋胡因婦採桑調其妻投
水死漢一魯秋胡求聘翟氏女翟公誤傳調妻事以
為薄行而不許婚俱可笑也

其次如國師劉秀以名應圖讖為王莽所殺而誅王莽
者為先武亦劉秀莽遣太師安新公王匡攻更始定
國上公王匡不勝為所執殺唐李尚書益與宗人益
者俱赴飲據上坐因笑曰今日兩副坐頭俱李益代
宗用韓翃知制誥宰相以平盧幕府員外及江淮刺

史請上書春城無處不飛花用此韓翃而員外得之
事皆奇

其他同時者漢時兩韓信俱高帝時一封楚王一封韓
王三郤平一故秦東陵侯一為齊王上柱國一齊相
兩校俱武帝時一浩侯一大行謀誘匈奴者也兩王
臧武帝朝一二年以郎中令自殺一六年為大常兩
王商俱成帝外戚一為丞相樂昌侯一為大司馬成
都侯兩王章俱哀帝時一河平三年以太僕為右將
軍六年復為太常一四年以京兆尹直言死兩王崇
俱平帝時一新甫侯故丞相嘉子一大司空扶平侯
魏兩王烈一字彥方有隱德一字長體有道術魯兩

王渾一為涼州刺史係戎之父一為司徒係濟之父
兩王澄一即濟之父弟封侯一即戎從弟荊州都督
兩孫秀一吳降將一趙王倫嬖臣俱拜驃騎將軍封
公兩周撫一為王敦將一為彭城內史誅梁兩王琳
一散騎常侍一德州刺史唐兩李光進俱代宗朝一
為光弼弟一為光顏兄俱蕃將賜姓為節度使封公
兩李繼昭俱昭宗時一為孫德昭一為符道昭俱賜
姓名降朱梁為使相宋兩王著俱太祖時一以文學
典制一以書學待詔金兩訖可俱太火將

稍先後者吳兩公子慶忌一王僚子一夫差末年將楚
兩莊躋一莊王時大盜一莊王裔孫將軍平滇自王

者漢兩王莽一右將軍一大司馬篡位者兩王鳳一
大司馬大將軍一更始成國上公兩王譚一宜春侯
一平阿侯兩徐幹一都護班超司馬一丞相曹操掾
晉兩劉毅一光祿大夫一衛將軍兩張禹一丞相一
太傅俱封侯兩解系一見陶璜傳一自有傳兩王鐘
一武帝舅一安帝時丹陽尹元兩伯顏一太傅淮陽
王一大丞相秦王兩蕭鈞一蕭鸞子梁武時中書郎
一蕭瑀從子唐太宗時率更令

異代而相類者兩王肅曹魏中領軍為魏制禮元魏尚
書令亦為魏制禮兩王殷朱梁以節度使叛誅後周
太祖亦以節度使誅兩王彥章梁六將為晉擒吳統

軍為楚擒兩王珪唐侍中宋左僕射門下侍郎兩王
溥一唐懿宗一周世宗俱宰相仙人有兩王喬其一
即子晉也其一為柏人令天墜玉棺以葬者僧有兩
智永一梁書僧一宋畫僧兩辨才一唐藏蘭亭真本
者一宋與蘇子瞻友者光武時固始侯李通魏武時
都亭侯李通衛大夫王孫賈齊大夫王孫賈魏徐邈
字景山見重武帝為侍中晉徐邈字仙虎見重武帝
為中書舍人魏將軍張遼漢兗州刺史張遼字叔高
漢中郎將江革梁御史中丞江革梁李膺為蜀使至
郡武帝悅之問曰今李膺何如昔李膺晉文公有咎
犯平公有咎犯善隱任政李宮密以祖母老辭官後

魏李密以母老習醫又隋李密封蒲山公則天時王
方慶為相又王方慶領尚藥奉御高宗初張昌宗為
修文館學士則天末張昌宗為春官侍郎

父子同名者二人隋處士羅靖父亦名靖魏大將安同
父名屈子亦亦名屈。王彪之臨之納之准之與之
進之凡六世王胡之茂之裕之瓚之秀之凡五世王
羲之獻之靖之悅之凡四世王晏之昆之陋之徐達
之湛之聿之凡三世胡母輔之謙之吳隱之顏瞻之
顏悅之愷之凡兩世俱仍之字

古今事有絕相類者聖主時投水人知有卞隨務光而
不知有此宮無擇。騎青牛人知有老子而不知有

封達。○生空桑人。知有伊尹而不知有孔子。○白魚入舟人。知有周武王而不知有宋明帝。○河澌水合人。知有漢光武之滹沱而不知有慕容德之黎陽。○鳳雛人。知有龐統而不知有顧邵。○獻胙加胙毒以讒賜死人。知有晉獻公子申生而不知有秦孝文王子西蜀侯暉。○思妾令方士致魂人。知漢武之於李夫人而不知宋武之於殷淑儀。○治阿譽聞而阿不治人。知齊宣王之夫大而不知景公之晏子。○夢寐求相人。知高宗之傳說而不知文王之臧丈人。○題壁作龍蛇歌人。知有晉文之介子推而不知晉文之舟子僑。○秦許楚地而背之人。知張儀之於楚懷王。

而不知馮章之於楚王。先食不知之藥而以巧言
免死人知方朔之於漢武帝而不知中射之士之於
楚王。倚柱讀書雷雷震不輟人知有夏侯玄而不
知有諸葛誕。一字直百金人知淮南子而不知公
孫子。妻棄夫人知朱買臣而不知太公望。沉江
負父人知孝女曹娥而不知趙社女光絡。掘地得
石槨人知有滕公而不知有衛靈飛廉。看竹不問
主人人知有王徽之而不知有袁粲。獲偷侍兒人
試文不殺因以賜之人知有楊素之於李靖而不知
有蔡興宗之於孫敬玉。侍兒環執飲饌人知有王
武子而不知有楊國忠孫晟國忠晟又俱號內臺監

○羊羹不徧致敗人知華元之於御斟而不知中山王之於司馬子期。乳生潼人知有元德秀而不知有李善。綵衣娛親人知有老萊而不知有伯俞。智囊人知有晁錯而不知有擣里子魯匡。讀易至損益而數人知有向平而不知有孔子。佩六國印人知有蘇秦而不知有樂大。以石為虎射之沒羽人知有李廣李遠而不知有熊渠子。逐兔墮馬折脇而殂人知有齊主高演而不知有燕主慕容皝。倒用印人知有段秀實之阻朱泚而不知有李松之安蜀。一日殺二烈人知有袁紹之於臧洪陳容而不知有張敬兒之於邊榮程邕之。能使人主前席人

知有賈誼而不知有商鞅蘇綽。飲千日酒至期發
冢而醒人知有劉玄石而不知有趙英。御屏隔座
人知有漢鄭弘第五倫而不知有吳紀亮紀隨。杯
中蛇影人知有樂廣而不知有南皮令應柳樂弓應
弩。殺孝婦大旱三年人知有前漢之東海而不知
有後漢之上虞。萬石君人知有石奮而不知有秦
襲張文瓘。留犢事人知有時苗而不知有羊倫。
食脫粟人知有公孫弘而不知有晏嬰。錢神論人
知有魯褒而不知有胡毋民成公綏。記丰面人人
知有楊愔而不知有應鳳。陳蕃下榻人知有徐穉
而不知有周球。雪中高卧人知有袁安而不知有

胡定。○夢贈筆人。知有江淹。而不知有王彪之。王珣。紀少瑜。陸倕。李白。和凝。李嶠。馬裔。孫。○喫酒救火人。知有樂巴。而不知有樊英。邵信。臣郭憲。佛圖澄。武丁。○入水戮蛟人。知有周處。而不知有澹臺子羽。荆飲。飛。丘訴。羊車游後宮。以鹽水洒地。人知有晉武。而不知有宋文。○御膳中有髮。自數三罪。以免死人。知有晉平公之庖人。而不知先武之陳正。○因病嘗真人。知有句踐之於吳。夫差。而不知郭弘。宿霸。之於魏。元忠。○以酒賜妒婦。飲之。無恙。人知有太宗。之於房。玄齡。而不知有莊宗。之於任。圜。○即席盡器。飲酒歸。而尚醒。稱所得器人。知有裴弘泰。之於裴鈞。而不知有潘炕。之於朱。

梁太祖。下第獻燕詩。座主以明年登第人。知有章
孝標。而不知有於化成。刻石高山深谷人。知有杜
預。而不知有顏真卿。賜行酒人。知有顧榮。而
不知有何遜。陰鏐。一箭落雙鷗人。知有斛律光。而
不知有拓拔幹高駢。錦纜事人。知有隋煬。而不知
有甘寧。燃臍膏為燭人。知有董卓。而不知有滿奮。
還帶陰德至相位人。知有裴中令。而不知有白中
令。少孤門生廢蓼莪人。知有王裒。而不知有顧歡。
發塚類遠祖貌人。知有蕭穎士。之於鄱陽王。而不
知有吳綱。之於長沙王。入山妻二仙女。而歸人。知
有天台之劉晨。阮肇。而不知有判縣之袁柏狼頌。

因食辨勞薪人知有荀勗而不知有師曠。強索妾
人知有孫秀武承嗣而不知有阮佃夫。聞鼓角聲
加敬人知有范雲之於梁武而不知有到仲舉之於
陳武。誓墓不仕人知有王羲之而不知有何偃。
通它心觀人知有國忠師之於大耳三藏而不知有
普寂之於柳中庸。祭賽忘書刀在廟鯉魚為送人
知有馬當山之王昌齡而不知有宮亭湖之祐客。
弈棋覆局人知有王粲而不知有到溉。製千字文
人知有周興嗣而不知有蕭子範。贈柳妾人知有
韓翃而不知有李還古。即位御床陷地人知有桓
玄而不知有侯景。誤食燥豆人知有王敦而不知

有陸暢。殯逆旅。書生人知。有王忱。而不知有鮑子都。廖有方。橋神貌醜。以足潛畫。之人知。有定州之張平子。而不知有忖留神之魯般。駱駝負水養魚。軍中人知。有宋孫仁祐。而不知有隋虞孝仁。殺負心僕人。知有張詠。而不知有柳開。金蓮歸院人。知有蘇軾。而不知有王珪。晉平公出言不當。師曠舉琴撞之。跌衽宮壁。魏文侯出言不當。師經舉琴撞之。中旒潰。一見淮南子。一見劉向說苑。燕太后不肯以少子質齊。因陳翠愛子之說。而許趙太后不肯以少子質秦。因左師觸龍愛少子之說。而許。一見趙世家。

一見戰國策。高齊神武不貴慕容紹宗。以留文襄。

唐文皇暫出李勣以留高宗俱見本紀。申鳴援桴

而進戰為賊殺其父功成而自殺趙苞援桴而進戰

為賊殺其母功成而嘔血死一見說苑一見後漢書

○醫診脈晉平公而曰君之病在膏之下肓之上秦

武王示扁鵲病而曰君之病在耳之前目之上謂皆

以色致也一見左傳一見戰國策。東方朔知赤物

為恠哉飲酒十石李章武知鐵斧為厭物飲血三斗

一見搜神記一見酉陽雜俎。懷素習書數畝芭蕉

鄭虔習書數屋柿葉俱見法書錄。孫臏刖足於魏

而為齊師司馬喜刖足於宋而為中山相一見本傳

一見呂氏春秋。王濟以錢千萬與王愷賭射八百

里牛一勝而探牛心爾朱文略以好婢與高歸彥賭

射千里馬一勝而截馬頭一見晉書一見北齊書○

鄂千秋明蕭何功高立封侯公孫戎明樊噲不反立

封二千戶一見蕭何傳一見王莽傳○兖州刺史李

恂郡縣小麥園小麥胡麻悉付從事揚州刺史費遂

郡園小麥胡麻悉付從事一見東觀記一見謝承後

漢書○孫權得諸葛恪而以老桑熟龜精張華得雷

煥而以老桑辨狐精一見搜神記一見集異志○漢

郭林宗遇雨中折角人遂為折角巾周獨孤信馳馬

帽微側人遂為側帽一見後漢書一見北史嚴峻為

吳大帝誦孝經仲尼居張輔吳昭以為鄙生請誦君

子之事上章陸澄為齊武帝誦孝經仲尼居王衛軍
儉以為博而寡要請誦君子之事上章一見吳志一

見南齊書

○吳大帝夢人以筆點額熊循賀以為當作

主齊文宣夢人以筆點額王曇首賀以為常作主俱
遂即位一見吳祚國統志一見齊書○魏文帝為王

時夢日墮地分為三分己得一分納諸懷中陳文帝

微時夢亦然後俱為三分之主一見談藝一見陳本

紀

○張茂先白鸚鵡夢為鷲鳥搏揚太真白鸚鵡亦

夢為鷲鳥搏一見異苑一見明皇雜錄○歐陽率更

見索靖碑初看曰浪得虛名次日看曰名下定無虛

士坐卧其下十日不能去閻立本見張僧繇畫亦然

俱見宣和書畫譜。

楊司空素出見客挾侍姬紅拂

因奔李靖郭汾陽子儀出見客亦挾侍姬紅綃因奔

崔千牛

一見虬髯客傳一見崑崙奴傳

○飽蚊温席

人知有吳猛而不知漢時番禺之有羅威

夜航船卷之五

古劍陶菴老人綉

倫類部

君臣

在三之義 晉武公伐翼殺哀侯止樂子曰苟無死矣
吾令子為上卿辭聞曰成聞之人生於三事之如一
父生之師教之君食之

無忘射鈎 管仲將兵遮莒道射桓公中帶鈎後魯在
梛管仲送於齊齊忘其仇以為相謂桓公曰願君無
忘射鈎臣無忘檻車

前席 賈誼為長沙王傅文帝徵之至入見上問鬼神

之事誼具道所以然至夜半文帝前席聽之

溫樹 孔光領尚書事典樞機十餘年守法度修政事
不希苟合或問溫室省中樹皆何木也光荅以他語
其謹密如此

下車過闕 衛靈公與夫人南子夜坐聞車聲轉轉至
闕而止過闕復有聲公問為誰夫人曰此必蘧伯玉
也妾聞禮下公門式路馬伯玉賢大夫也敬於事上
必不以闇昧廢禮視之果然

枯桑八百 諸葛亮謂後主曰成都有枯桑八百株薄
田十五頃子孫衣食自足臣決不長尺寸使庫有餘
帛廩有餘粟以負陛下

醴酒不設 楚王元敬禮穆生每食必設醴酒一日不設穆生曰醴酒不設王意怠矣遂去

一動天文 李泌謂肅宗曰臣絕粒無家祿位與茅土皆非所欲為陛下運籌帷幄收復京城但枕天子膝睡一覺使有司奏客星凡客座一動天文足矣

封留 張良其先五世相韓秦滅韓良即棄家求刺客報韓仇不果乃佐高帝滅秦定天下大封功臣令良自擇萬戶良曰臣初從帝於留封留足矣尋素人間事從赤松子辟穀呂后強食之曰人生一世間如白駒過隙何至自苦如此

御手調羹 唐玄宗召李白至見金鑾殿論當世事奏

頌一篇帝賜食親手為調羹

御手燒梨 唐肅宗常夜召穎王等二弟同於地爐親
毯上坐時李泌絕粒上自燒二梨手擘之以賜泌穎
王恃恩固求上不與曰汝飽食肉先生絕粒何乃爭
耶

鹽酒同味 崔浩論事語至中夜太宗大悅賜浩縹醪
酒十斛水晶戎鹽一兩曰朕味卿言若此鹽酒故與
卿同此味也

學士歸院 唐令狐綯在翰林日夜入對禁中宣宗命
以乘輿金蓮燭送還院院吏望見以為天子來傳俄
呼云學士歸院

撤金蓮炬 蘇軾任翰林宣仁高大后召見便殿曰先
帝每見卿奏疏必曰奇才奇才因命坐賜茶撤金蓮
寶炬送院

登七寶座 唐玄宗於勤政殿以七寶裝成大座召諸
學士講論古今勝者升座張九齡論辨風生首登此
座

畫寢加袍 韋綬在翰林德宗常至其院韋妃從幸會
綬方寢學士鄭絅欲馳告之帝不許時適大寒帝以
妃蜀錦襪袍覆之而去

金筋表直 唐開元時宋璟為相朝野歸心時侍御宴
帝以所用金筋賜之曰非賜汝筋以表卿直也

藥石報之 唐太宗時中書高季輔上封事特賜鍾乳

一劑曰卿進藥石之言故以藥石報之

世執貞節 于忠遠散騎常侍嘗因侍宴宣武賜之劍
杖舉酒屬忠曰卿世執貞節故恒以禁衛相委昔以
卿行忠賜名曰忠今以卿才堪禦侮以所禦劍杖相
錫

一門孝友 崔鄆總麻同爨兄弟六人至三品邠鄆鄆
凡為禮部五吏部再唐興無有也居先德里宣宗曰
鄆一門孝友可為士族法因題曰德星堂里為德星
里以旌之

親手和藥 曹彬疾革真宗親問手為和藥仍賜白金

萬兩問以從事答曰臣無事可言臣二子琛共瑋村器可取臣若內舉皆堪為將真宗問以優劣答曰琛不如瑋

相門有相 王訓年十六召見文德殿應對爽徹梁武
武帝目送之曰可謂相門有相

有古人風 劉查為東宮舍人昭明太子以飴食器賜
之曰卿有古人風收遺卿古人之器

賜靈壽杖 孔光字子夏經學尤明舉方正為諫議大
夫兄弟妻子燕語不及朝省政事賜靈壽杖歸老於
第

剪鬚和藥 李勣既忠力帝謂可托大事嘗暴病疾醫

曰用鬚灰可治帝乃自剪鬚以和藥及愈入謝頓首
流血帝曰吾為社稷計何謝為

賜胡瓶 漢紀李大亮為金州司馬有臺史見名鷹諷

大亮獻之大亮密表曰陛下絕畋獵久矣猶求鷹信
使者猶求鷹信陛下意邪乃乘昔旨如其擅求是使
非其才太宗報書曰有臣如此朕何憂古人以一言
之重訂千金今賜胡瓶一雖亡千鎰乃朕所自御又
賜荀悅漢紀曰悅議論深博極為政之體公宜繹味
之

賜二銘 馬燧帝賜宸扆台衡二銘以言君臣相成之
美勒石起義堂帝榜其顏以寵之

詩奪錦袍 宗之問與楊炯分直習藝館武后游終南
門詔從臣賦詩左史東方虬詩先成后賜錦袍之問
俄頃獻后覽之嗟賞更奪袍以賜之

賜玉堂字 淳化中翰林蘇易簡獻續翰志二卷太宗
賜御詩二章又飛白書玉堂之署四字賜之

賜金龍扇 宋張詠為御史中丞時真宗令進所著述
帝稱善取所執銷金龍扇賜之曰美卿金日獻文事

賜醪醕酒 唐李吉甫盛贊天子李絳曰今日西戎內
訌烽燧相接正陛下求治之時何得僅以贊頌為言
帝入謂左右曰絳言骨鯁真宰相也遣使賜醪醕酒

周讀書人

宋太祖建元命母襲舊號遂名乾德一日

宮中見古鏡有乾德字恠問臣下俱不能知獨竇儀對曰昔蜀王有此年號此必蜀中宮女帶來者問之果然上歎曰宰相須用讀書人

朕之裴度 宋慶曆中貝州兵亂師久無功參知政事文彥博請行凱旋上勞之曰卿朕之裴度也

禁中頗牧 唐畢誠為翰林學士羗人擾河西宣宗召訪邊事誠論破羗狀甚悉上曰頗牧近在禁中

朕之汲黯 宋田錫天性骨鯁奏經史中治體之要三十篇真宗手詔褒獎每見錫色必矜莊帝自謂曰田錫是朕之汲黯

巾車之恩 馮異朝京師光武詔曰倉卒燕蓐亭豆粥

濤沔河麥飯厚恩久不報異曰臣欲國家無忘北河
之難臣不敢忘中車之恩

尚書履聲 漢鄭宗為尚書僕射數諫諍上納用之每
聞其革履聲曰我識鄭尚書履聲

軟脚酒 唐郭子儀自同州歸代宗詔大臣就宅作軟
脚局人出錢三千

佐朕致太平 王旦祐次子器誠遠大真宗嘗目之曰
送之曰佐朕致太平者必斯人也

儒與吏不及 明王興宗初為皂隸洪武特命為金華
知縣李丞相言隸也奈何為令上曰興宗勤而不貪
又善處事儒與吏不及也何有於縣後蘇乏守上曰

莫如興宗用之有善政

風度得如否 唐玄宗每訪士必曰風度得如九齡否
文武魁天下 宋薛奕興化人中武舉第一時同郡徐
鐸亦冠文科神宗賜以詩有一方文武魁天下萬英
里英雄入彀中之句後於國變死難

獎諭賜食 明王來巡按蘇松奉勅同侍郎周忱考察

官吏制詞有請上裁語來曰貪官污吏當去宜即去
之奏請遲留民益受弊矣三楊覽奏曰王來明達治
體遂易與之由是貪暴望風引去有巨璫陳武奉太
后懿旨散經江南要素百端人人畏之來收其榜謂
與詔書不合擬劾之璫哀祈得免及還訴於上上問

顧佐曰蘇州巡按為誰佐曰王來上日記之及代還
佐引以奏上加獎諭賜食光祿

賜金奉祀 漢朱邑官至大司農卒天子惜之曰朱邑
退食自公無疆外之交可謂淑人君子賜其子黃金
百斤奉祀

有唐忠孝 韓思復兒時母為語父亡狀嗚咽欲死舉
茂才高第家益貧杜綾瑾以百綾餉思復方日併而
食而百綾完對不發累遷襄州刺史治行名天子下
及卒上手題其碑曰有唐忠孝韓長山之墓

骨格必壽 明宋訥仕至祭酒嚴立學規學錄金文徵
之嗾冢宰余熛移文以老致仕及陞辭上訊知其故

誅燦及文徵訥居職如故上恒謂訥骨格必壽命盡
工繪其像年八十餘終于官上自製衣文祭之後每
思訥舉為教國子者法命仍官其子復祖為司業

不避艱險 昭烈與關羽張飛寢則同牀恩若兄弟而
稠人廣坐侍立終日隨備周旋不避艱險

遂從不去 張良聚少年百人道遇沛公良數以太公
兵法說沛公沛公善之嘗用其策良為他人言皆不
省良曰沛公殆天授故遂從不去

魚之有水 劉備見諸葛亮於隆中凡三往而始得情
好曰密關羽張飛不說備解之曰孤之有孔明猶魚
之有水也

安劉者勃也 漢高祖疾甚呂后問曰陛下百歲後蕭相國死誰可代之曰曹參其次曰王陵然少戇陳平可以助之平知有餘然難獨任周勃重厚少文然安劉氏者必勃也可令為太尉

賜周公圖 漢武帝以子弗陵年穉察羣臣唯奉車都尉霍光忠厚可任大事乃使黃門畫周公負成王朝諸侯以賜光上病篤霍光涕泣問曰如有不諱誰當嗣者上曰君未諭前畫意耶立少子君行周公之事去襜帷 漢刺史郭賀官有殊政明帝賜以三公之服黼黻冕旒敕行部去襜帷使百姓見其容服以章有德

一見如舊友 符堅自立為秦天王尚書呂婆樓薦王
猛於堅堅召猛一見如舊友語及時事大悅自謂如
劉玄德之遇孔明也

父子

弄璋弄瓦 詩經吉夢維何維熊維羆男子之祥維虺
維蛇女子之祥乃生男子載衣之裳載弄之璋乃生
女子載衣之裼載弄之瓦

誕彌日月 詩經載生載育時維后稷誕彌厥月

嶽降 詩經崧高維嶽峻極於天維嶽降神生甫及申

懸弧設帨 男子生桑弧蓬矢以射天地四方欲其長
而有事於四方也 禮記男子生設弧於左女子生

設帨於門右

初度 離騷云皇覽揆余初度兮肇錫余以嘉名

添丁 唐盧仝生子名添丁宋賈耘老子名亦添丁耘

老生子之妾名雙荷葉

湯餅會 生子三朝宴客曰湯餅會劉禹錫送張盟詩
爾生始懸弧我作座上賓引筋舉湯餅祝詞生麒麟
拿週 曹彬始生週歲父母羅百玩之具名曰晬盤觀
其所取以見志彬左手提戈右手取印後果為大將
封王

大白後身 郭祥正母夢李太白而生祥正有詩名梅
堯臣曰功夫天才如此真太白後身也

玉燕投懷 張說夢生一玉燕飛入懷中有孕生說後
為宰相封燕公

九日山神 三衢陳圭簿妻夢一偉人來謁恠問之告

曰吾九日山神也已而生子有異徵因合九日二字
名旭後避廟諱改升之神宗朝拜相

靈鳳集身 南史王曇逸母夢靈鳳集身有孕又聞腹
中啼聲僧寶誌曰生子當如神仙宗伯

金鳳銜珠 南昌許遜母夢金鳳銜珠墮掌而生晉初
為旌陽令得異人術周游江湖悉斬蛟蜃除民害精
修山中年一百三十六舉家飛昇

授五色珠 宋樂史母夢異人授五色珠而生史力學
能文舉進士第一立朝有聲著太平寰宇記

五日生 田文以五月五日生其父嬰欲棄之母竊舉
及長謂嬰曰君相齊久矣齊不加廣而私家貲累鉅

萬門下不見一賢者文竊恠之嬰乃禮文使治家通
賓客

夢鄧禹 宋范祖禹生母夢一丈夫被金甲至寢所曰
吾漢將鄧禹也祖禹生遂以為名

夢楓生腹 唐張志和母夢楓生腹上而產志和母亡
不復仕自號烟波釣徒

電光燭身 宋宗澤母劉夢天大雷電光燭其身翌日
舉澤少有大志累功拜副元帥起兵勤王大破金兵
夢賢人至 謝靈運父不宜子乃於杜明甫舍寄養是
夕夢有賢人至及曉乃靈運也武林山有夢兒亭

右脅生 老子姓李名耳字伯陽諡聃母懷之八十一

歲從右脇生因號老子

夢虎行月中 滕元發母夢虎行月中墮其室而元發
生九歲能詩舉進士治邊威行西夏

真英物 桓溫生未晷月而溫嶠見之曰此兒有奇骨
及聞其聲曰真英物也父彘以嶠所賞故名溫豪爽
有風槩累功進大司馬

龜息 李嶠母以嶠問袁天綱答曰神氣清秀恐不永
耳請伺嶠卧而候其鼻息乃賀曰此龜息也必貴而
壽

夢長庚 李白母娠時夢長庚星現幼名長庚後改曰
白

產有異光

虞允文產之日戶外有異光識者知其為

大器十歲賦詩多驚人語

鍾巫山之秀

揚雄之父寓巫山而生雄論者謂鍾十

二峯之秀

皆名將相

陳省華官諫議大夫陳搏嘗謂省華曰君

之子皆名將相也後省華謝政家居三子並衣金紫

扶杖長堯叟世稱賢相次堯佐官太子太師季堯咨

官節度使善射世稱小由基

孕靈此子

五代王承肇母崔氏夢山神牽五色獸逼

其衣遂生承肇有異僧見而撫之曰老僧所居周公

山佳氣減半乃孕靈此子耶後節制洛州以功名著

父辱子死 彭修年十五侍父出行為盜所劫修拔刀
向盜曰父辱子死汝不畏死耶盜驚曰童子義士母
逼之遂遁去

一子不可縱 劉摯兒時父居正課以書朝夕不少間
或謂君止一子獨不加恤耶居正曰正以一子不可
縱也

事父猶事君 殷淵剛介多大節從父宦游父行事未
當必辨論侃侃嘗言事父猶事君不以諛諾為恭後
死闖賊難

娶長妻 馮勤祖父偃長不滿七尺自恥短陋乃為子
伉娶長妻生勤八尺三寸

一門七業 劉殷有七子五子各授一經一子受太史公史記一子受漢書一門之內七業俱興北州之學殷門為盛

胎教 孟子少時問東家殺猪何為謂母曰啖汝既而悔曰吾聞胎教割不正不食席不正不坐食今適有知而欺是教之不信乃買猪肉啖之

七子孝廉 趙宣妻杜泰姬生七男教之曰中之性情可上下也昔西門豹佩韋以自寬宥子賤佩弦以自急汝曹念哉後七子皆辟孝廉而元珪稚珪更以令德著

各守一藝 鄧禹有子十三人各守其藝閨門雍睦累

世寵貴漢庭者凡百餘人

兒必貴 王珪母李氏嘗曰兒必貴未知所與游者何人適至齡如晦造訪母大驚曰二客皆公輔器汝貴不疑矣

蘇瓌有子 蘇頌父瓌同李嶠拜相一日召二子進見帝曰蘇瓌有子李嶠無兒

是父是子 呂昭知沁州臨行父老持金相贈昭曰吾無劉寵之愛敢為父老留一錢哉却不納子旦初第昭誡之曰苟酌貪泉死不歆祀噉冰茹蘗是父是子父子四元 倫文敘弘治乙未會元狀三子以諒以訓以誥皆成進士以諒鄉試第一以訓會試第一以誥

殿試第二父子居四元為科名盛事

一如其父 范仲淹知耀邠皆有善政趙元昊叛知永興軍時稱小范老子胸中有數萬甲兵子純禮亦知永興為政一如其父

一褐寄父 鄭楚任副使常市一褐寄父貽書問何處得此褐母以不義污我家教嚴故楚制行最清謹

天上麒麟 杜詩徐卿二子生絕奇感應吉夢相追隨孔子釋氏親抱送並是天上麒麟兒

厲人生子 昔有厲人夜半舉子急持燈燭之蓋恐肖己也

三遷 孟子少時居近墓乃好為墓間之事孟母曰此

非所以教吾子也乃去居市廛孟子又好為貿易之事母曰此非所以教吾子也復去居學宮之傍孟子乃設俎豆揖讓進退孟母曰此可以教吾子矣遂居之

和熊 柳公綽妻韓氏常粉苦參黃連和熊胆為丸賜其子仲郢等夜學舍之以資勤苦

畫荻 歐陽修四歲而孤鄭氏教之家貧乏紙筆以荻畫地學字後成大儒官至觀文殿大學士

截髮 陶侃孤貧孝廉范逵常過倉卒無以款待母湛氏乃截髮以易酒又撤所卧草薦剉以餵馬逵見盧江守張夔稱之夔召侃領樅陽令

跨竈 竈上有釜故子過於父謂之跨竈蓋釜父與釜同音借以相喻也

鳳毛 宋謝鳳子超宗善文詞作殷妃誄帝數賞曰超宗殊有鳳毛杜詩欲知世掌絲綸美池上于今有鳳毛

雙珠 後漢韋康韋誕俱有時名孔融語其父端曰不意雙珠近出老蚌

豚犬 曹操見孫權歎曰生兒當如孫仲謀如劉景升兒子豚犬耳

老牛犢舐 楊彪子為曹操所殺操後見彪曰何瘦之甚曰愧無日磔先見之明猶懷老牛舐犢之愛操為

之改容

伯道無兒 鄧攸字伯道石勒之亂挈妻子及弟子縵以逃度不能兩全乃棄子存姪後卒絕嗣時人語曰皇天無知使伯道無兒

萱堂 萱草一名宜男妊婦佩之即生男故稱母為萱堂詩伯兮章焉得萱草言樹之北

椿庭 莊子云上古有大椿以八千歲為春八千歲為秋今人稱父曰春椿庭

喬梓 喬木高而仰父道也梓木實而俯子道也故稱父子曰喬梓

楂梨 張敷小字楂父邵小字梨宋文帝戲之曰楂何

如梨敷曰梨是百果之宗植何敢比

菽水承歡 子路曰傷哉貧也生無以為養死無以為禮也孔子曰啜菽飲水盡其歡斯之謂孝

為母殺雞 後漢茅容郭林宗訪之留宿旦日容殺雞為饌林容宗以為已設已而供奉其母林宗拜之曰卿賢乎哉因勸之學以成其德

自傷未遇 晉趙至年十二與母道旁看令上任母曰汝後能如此不至曰可爾耳早聞父耕叱聲牛釋耒而泣師問之曰自傷未遇而使老父不免勤苦風木之悲 春秋臯魚宦遊列國歸而親故泣曰樹不欲靜而風不息子欲養而親不在遂自刎死

毛義捧檄 毛義以孝行稱府檄至以義為安陽令義
捧檄而喜動顏色張奉薄之後義母亡遂不仕奉歎
曰往日之喜蓋為母也

為母遺羹 穎考叔為封人鄭莊公賜之食食舍肉曰
小人有母皆嘗小人之食矣未嘗君之羹也請之以
遺之

倚閭而望 王孫賈事齊閔王王出走賈不知其處其
母曰汝朝出而晚歸則吾倚門而望汝暮出不歸則
吾倚閭而望汝今事王王出走汝不知其處汝尚何
歸

對使伏劍 王陵歸漢項羽取陵母置軍中以招陵陵

母私送使者曰漢王長者吾兒母以老妾故持二心妾以死送遂伏劍而死

封還官物 陶侃少為縣吏常監魚池以魚鮓遺母母封鮓責之曰爾以官物遺我反增我憂耳拒却之

勿以母老懼 劉安世除諫官白母曰朝廷使兒居言路須以身任國脫有禍譴如老母何母曰諫官為天子諍臣汝父欲為而弗得汝幸居此當損身報主勿以母老為懼流放耳

對食悲泣 陸績繫洛陽母往饋食績對食悲泣使者問故曰母來不得見耳問何以知之曰吾母切肉未嘗不方斷葱以寸為度此必母所餉也使者以聞特

赦之

暴得大名 陳嬰母東陽少年殺其令欲立嬰為王母
曰吾自為汝家婦未聞汝先有貴者今暴得大名不
祥嬰乃屬漢

人不可獨殺 嚴延年為河南守母從東海來適見報
囚乃大驚不肯入府延年叩首謝母曰天道神明人
不可獨殺我不意垂老見壯子被刑戮也歲餘果敗
擊墮金魚 陳堯咨秩滿歸母問有何異政對曰荆南
當孔道過客以兒善射莫不歎母曰忠孝輔國爾父
之訓也爾不能以善化民顧專卒伍一人之技因擊
以杖墮其金魚

得與李杜齊驅 漢誅黨人詔捕急范滂白母曰仲博
孝敬足供養滂從龍舒君九原存亡得所惟大人割
不忍之恩母曰汝得與李杜齊驅死亦何恨令名壽
考可兼致乎

吾知善養 尹焞嘗應舉發策有誅元祐諸臣議焞不
對而出歸告其母母曰吾知汝以善養不知汝以祿
養也

能為滂母 蘇軾生十歲母程氏親授以書聞古今成
敗輒能領其要程讀范滂傳慨然嘆息軾請曰軾若
為滂母能許之否程曰汝能為滂我獨不能為滂母
母耶

口授古文 虞集母楊氏歸虞汲宋末兵亂汲挈家奔嶺外無書可攜讀母口授集左傳歐蘇文卒以文章名世皆母訓也

得父一絕 唐宋之間父名令文富文詞且工書有力絕人世謂之三絕後之間以文章顯之悌以驍勇聞之遜精草隸各得父一絕

父子諡文 明倪謙與子同入史局謙終南禮部尚書子岳終南吏部尚書父諡文僖文子諡毅父子諡文世以為榮

父長號 何遵幼閱范滂母事告母曰兒設為滂大人能慨然為滂母乎母笑曰而許之後為工部主事諫

武宗南巡荷校暴午門外五日杖死廷杖日父鐸在
里有烏悲鳴而前心異之比聞工部有以言獲罪者
父長號曰遵其死夫已而果然

以屏隔座 三國紀亮與子騭俱任吳亮為尚書令騭
為中書令每朝會以雲母屏隔座時論榮之

教忠 周狐突晉大夫懷公時突子毛及偃從重耳如
秦公執突曰子來則免對曰子之能仕父教之忠古
之道也今臣子從公子亡若又召之教之貳也卒就
死

當有五丈夫子 商瞿同年有梁鱧者年三十未舉子
欲出其妻瞿曰未也吾齒三十八無子吾母為吾更

娶夫子曰無憂也瞿過四十當有五丈夫子果然吾
恐子自晚生且未必妻過也居二年而梁有子

不如一經 韋玄成賢之子與蕭望之諸儒辨五經同
異於石渠閣漢元帝朝拜相守正持重不及父而文
采過之鄒魯諺曰遺子黃金滿籝不如一經

義繼母 齊二子之母宣王時有死於道者吏執其二
子兄曰我殺之弟曰非兄也我殺之吏以告王王名
問其母母泣對曰殺其少者王問故母曰少者妻之
子長者前妻之子其父臨終囑妾善視今殺兄活弟
是以私廢公也背言忘信是欺死也王高其義皆赦
之

他日救時宰相 于忠肅與如蘭為方外交忠肅彌月
如蘭赴湯餅之會摩其頂曰此他日救時宰相也

墨莊 宋劉式沒惟遺書數千卷夫人陳氏指謂諸子
曰此乃父墨莊也其後諸子及孫並起高第為時名
臣

各授一經 宋田闢行高學博游成均二十年不遇浩
然歸隱子九人各授一經俱登第時稱義方者必曰

田氏

箕裘 禮記良冶之子必學為裘良弓之子必學為箕
親導母輿 唐崔邠為太常卿親導母輿入太常署公
卿皆避道附各方稱位

附各稱方位

蜀人稱父曰郎罷吳人呼父曰爹音遮呼祖曰阿爹又

有呼曰公爹有呼父曰爺音涯有呼父曰爸音霸有

呼曰父曰爸音播遼東人呼父曰阿嘛母曰我娘湖

南人呼母曰咬祖有呼父曰阿叭母曰阿宜淮江人

呼母曰社李長吉呼母曰嬈吳人呼母曰姪音寐羌

人呼母曰姐江湖有呼母謂媿音侍青徐人呼兄曰

阿荒荒大也又曰號音選越人呼兄曰况楚人呼姊

曰嬈呼妹曰媿音位江湖人呼子曰崽音宰呼女曰

媿音悟又有呼子曰男女曰媛音媛赴越人呼子曰

娟吳人呼子曰孺音牙楚人呼妻母曰妯音氏東齊

補注有異
无字下

人呼塔曰倩呼賤役曰佻婦人呼夫之兄曰兄公稱

夫之姊曰女佻音中呼姊妹之子曰出音翠自稱曰

媿音盡猶稱我也稱舅母曰姪齊人呼姊曰媿音稍

將校有夢 楊价璨子未生時將校有夢神自靖州來

號蜀威將軍者暨价生貌狀如之襲職著邊功

夫婦附要

舉案齊眉 梁鴻至吳依臯伯通廡下為人賃舂妻孟光具食舉案齊眉伯通異之曰彼傭能使其妻敬之如此非凡人也以禮遇之

歸遺細君 東方朔割肉懷歸武帝問之曰歸遺細君糟糠 光武姊湖陽公主新寡欲下嫁宋弘帝語弘曰貴易交富易妻人情乎弘對曰貧賤之交不可忘糟糠之妻不下堂帝顧主曰事不諧矣

斷機 樂羊子游學未三月而歸其妻引刀斷機曰君子尋師中道而歸何異斷斯織乎羊子乃發憤卒業二喬 周瑜從孫策攻皖得喬公兩女皆有殊色策自

納大喬瑜納小喬策謂瑜曰喬公二女雖流離得吾
二人為壻亦足為歡

有兄之風 孫權妹劉先主初在荊州孫權以妹妻之
妹才捷剛猛有諸兄之風侍婢百餘人皆執刀侍立
先主每入心常凜凜

婦有四德 許允婦貌醜允曰婦有四德卿有幾德婦
曰妾之所不足者色耳士有百行卿有幾行允曰皆
備婦曰君好色德不如好色何謂皆備允大慚禮之
終身

執中櫛 左傳晉太子圉質於秦秦妻之將逃歸嬴氏
曰寡君使婢子執中櫛以固子也縱子私歸棄君命

也不敢從

奉箕帚 單父人呂公好相人見劉季狀貌異之曰僕
閱人多矣無如季相僕有弱息女願為箕帚妻

吾知喪吾妻 劉庭式嘗聘鄉人女及登第女喪明家
且貧甚鄉人不敢復言或勸改聘庭式歎曰心不可
負卒娶之生數子死哭之慟蘇軾時為州守問曰哀
生於愛愛生於色足下愛何從生哀何從出乎庭式
曰吾知喪吾妻而已軾深感其言

畫眉 張敞為京兆尹為婦畫眉有司奏聞上問之對
曰夫婦之私有過於此者上弗責

牛衣對泣 王章家貧無被卧牛衣中與妻涕泣妻怒

曰京師貴人誰踰仲卿者不自激昂乃反涕泣何鄙也後果為京兆

別目 房玄齡布衣死時病且死謂妻盧氏曰吾病不起卿少年不可寡居善事後人盧泣入帷中剔一日以示信玄齡疾愈後入相禮之終身

織錦迴文 竇滔妻蘇氏字若蘭苻堅時滔拜安南將軍鎮襄陽攜寵姬趙陽臺以行蘇悔恨因織錦為迴文題詩二百餘首縱橫反覆皆為文章名曰璇璣圖以寄滔

不從別娶 宋黃龜年為侍御史劾秦檜遂奪檜職初邑簿李朝旌許妻以女旣登第而朝旌已死家甚貧

或勸其別娶不從

小吏名港 漢廬江小吏焦仲卿妻為姑所逐自誓不嫁其母屢逼之遂投水死仲卿聞之亦亦縊今府境有小吏港以仲卿名

相思樹 韓憑妻封丘息氏康王奪之憑自殺息與王登臺遂投臺下死遺書於帶願以尸骨賜憑王弗聽使人埋之塚相望也信宿有交梓本住於二塚之旁旬日而枝成連理鴛鴦棲其上交頸悲鳴宋人哀之號曰相思樹

知禮 季敬姜魯大夫公甫穆伯之妻也子文伯相魯退朝敬姜方績文伯曰以歡之家而猶績手敬姜歎

曰夫民勞則思思則善心生逸則淫淫則忘善忘善則惡心生吾懼穆伯之絕祀也及文伯卒敬姜朝哭穆伯暮哭文伯仲尼聞之曰季氏之婦不知禮矣作誄柳下惠卒門人欲誄之妻曰將誄夫子之德耶則二三子不如妾知之也乃作誄

諡康 黔婁先生卒曾西往弔見其屍覆布被手足不盡斂曾西曰邪引其被則斂矣妻曰邪而有餘不若正而不足死而邪之非先生意也曾西曰何以為諡妻曰先生不戚戚於貧賤不汲汲於富貴其諡曰康可乎曾西歎曰惟斯人也而有斯婦

預結賢士 晉大夫伯宗好以直辨凌人人惡之妻曰

危可立待也何不預結賢士以州犁托馬伯宗乃得
畢羊而交之未幾伯宗以譖死畢羊送州犁於荆幸
免

柏舟 共姜衛世子舟伯妻共伯蚤折父母欲奪而嫁
之以死自誓作柏舟詩

共隱終身 王霸少與令狐子伯善後子伯相楚其子
為郡功曹嘗詣霸霸子耕於野投未見客顏色慚阻
客去霸卧不起妻問故霸曰彼子容服都兒曹有慚
色父子恩深不覺自失耳妻曰子霸之貴孰與君之
高奈何忘風志而慚兒女子乎霸起而笑曰有是哉
遂共隱終其身

女宗 鮑蘇仕衛三年而娶外妻其妻養姑甚謹其姒
曰子可以去矣答曰婦人從一為貞以順為正豈有
專夫室之愛為賢哉事姑愈謹宋公表其閭曰女宗
封髮 唐賈直言坐事貶嶺南妻董氏名德貞年甚少
訣曰死生未期汝可亟嫁貞不答引繩束髮封以帛
使直言署曰非君不可解直言貶二十年乃還帛如
故

受羊埋之 羊舌子好直不容於晉去三室之邑邑人
攘羊而遺之羊舌子不受妻叔姬曰不如受而埋之
羊舌子曰何不餉盼與鮒姬曰不可南方有烏為吉
乾食其子不擇肉子多不義今盼與鮒童子也隨大

人而化不可食以不義之肉乃盛以甕埋壚陰後攘羊事敗事吏發視之舌尚存曰君子哉羊舌子不與攘羊矣

弓工妻晉繁人之妻也平公使繁為弓三年乃成公引射而不穿一札將殺之其妻請見曰妾夫造弓勞矣君不能射反以殺人妾聞射之道左手如拒右手如附右手發之左手不知公用其言而射穿七札立釋繁人

迎叔隗 晉文公與趙衰子奔狄狄人隗氏入二女公納季隗以叔隗妻衰生盾及反國文公又以女趙姬妻之生三子趙姬請迎盾與其母衰不敢從姬曰得

寵忘舊安富室而棄賤交不可君其迎之衰乃迎叔隗與盾於狄

提甌出汲 桓氏字少君鮑宣就少君父學父竒其清苦以女妻之裝送甚盛宣不悅少君悉屏去侍從服飾更布素與宣共挽鹿車歸里拜帖即提甌出汲修婦道

御妻 晏子出其御之妻從門間窺其夫意氣揚揚自得既而歸妻請去曰晏子身相齊國名顯諸侯觀其志常有以自下者子為人御自以為足妻是以求去也御者乃重自抑晏子怪而問之以實對薦為大夫效少君 馬融女適汝南袁隗禮初成隗曰婦奉箕帚

而已何乃珍麗對曰慈親愛重不敢違命君若慕鮑
宣之高妻亦效少君之事

破鏡 樂昌公主下嬪於徐德言陳亡德言與主破鏡
各分其半後主為楊素所得德言寄詩云鏡與人俱
去鏡歸人未歸樂昌得詩悲泣不已素愴然名德言
還之

造廬而弔 杞梁死國事喪歸齊莊公遇於途欲弔其
妻曰君以吾夫之死為有罪則不敢辱君之弔如以
為無罪則先人有敝廬在何弔於途公乃造其廬而
弔焉

琴心 司馬相如與臨邛令善富人卓王孫聞令有貴

客為具名之酒酣令請相如撫琴時卓王孫女新寡
竊聽相如以琴心挑之文君遂夜奔相如與之歸成
都

白頭吟 司馬相如將聘茂陵女為妻卓文君作白頭
吟以自絕相如感之乃止

妬婦津 劉伯玉妻段氏悍妬聞其夫誦洛神賦投洛
水死後人名其地為妬婦津有人渡此者必濕其衣
粧

四畏堂 王文穆作三畏堂夫人悍妬楊文公戲曰可
改作四畏堂公問故曰兼畏夫人

獅子吼 陳季常妻柳氏悍妬客至或聞詬詈聲坡公

詩戲之曰誰似龍丘居士賢談空說有夜不眠忽聞
河東獅子吼拄杖落手心茫然

恐傷盛德 謝太傅劉夫人性妬常帷諸妓作樂太傅
暫見便下帷太傅索更一闌夫人拒之曰恐傷盛德
鶴庚止妒 梁武帝平齊獲侍兒千餘都后憤恚成疾
左右曰山海經云食鶴庚止妒后食之妒果減半

炊糜度 百里奚為秦相堂上作樂有浣婦自言知音
援琴歌曰百里奚五羊皮憶別時烹伏雌炊糜度今
當富貴忘我為尋問之乃其妻也

周姥撰詩 謝太傅欲置伎妾命兄子往勸夫人因言
關雎螽斯不如之詩夫人問誰為此詩云是周公夫

人曰周公是男子周姓撰詩當無是語

何由得見 桓温尚南康公主經年不入其室一日温
與司馬謝奕飲奕以酒逼温温逃入主所奕遂升廳
事引一直兵共飲曰失一老兵得一老兵何恠也主
謂温曰君若無狂司馬我何由得見

羞墓 朱買臣刈薪自給妻求去買臣笑曰我年五十
當富貴妻恚曰如公等終餓死溝中耳買臣不能留
無何拜會稽太守乘傳入吳見故妻從夫治道載之
後車妻愧死葬於嘉興呼為羞墓方正學有詩云青
草塘邊土一丘千年埋骨不埋羞叮寧囑咐人間婦
自古糟糠合到頭

秋秋胡挑妻 魯秋胡娶妻五日官於陳後歸見採桑
女子下車挑之曰力田不如逢年力桑不如見郎吾
有黃金願以與子婦不受歸及見其夫乃挑我者也
遂數胡罪而沉於河

難做家公 郭汾陽子曖與昇平公主詬詈曖曰汝倚
父為天子耶我父薄天子而不為耳主入奏子儀囚
曖入待罪代宗曰不啗不聾難做家公小兒女閨闈
之言弗聽

如不畏死 唐任環為兵部尚書太宗賜宮人二人妻
柳氏妒之欲爛其髮使禿太宗賜酒曰飲之立死不
妒不須飲柳氏拜勅曰誠不如死舉卮飲盡太宗謂

環曰人不畏死卿其奈何二女令別室安置

鼓盆 莊子妻死惠子弔之莊子方箕踞鼓盆而歌惠子曰不太甚乎莊子曰人且儻然寢於巨室而我且噉噉然隨而哭之自以為不通乎正命故止之也

牝雞司晨 周武王曰牝雞無晨牝雞之晨惟家之索今商王受惟婦言是用

加公九錫 王導懼內乃以別館畜妾夫人知之持刀尋討導飛轡出門以左手扳車欄右手提塵尾柄以打牛狼狽而前蔡司徒謨曰朝廷欲加公九錫王信以為實蔡曰不聞餘物惟聞短轆犢車長柄塵尾王大羞媿

何況老奴 桓温平蜀以李勢妹為妾妻聞拔刀襲之
李方梳頭髮垂委地姿貌端麗乃徐結髮斂手向妻
曰國破家亡無心至此若能見殺猶生之年神情間
正辭氣悽惋妻乃擲刀前抱之曰我見猶憐何況老
奴遂善視之

如夫人 齊侯好內多內寵內嬖如夫人者六人

解白水詩 管仲姜名婧桓公出游甯戚扣牛角而商
歌公使管仲迎之戚曰浩浩乎白水管仲不知所謂
婧曰古有白水之詩曰浩浩白水儵儵之魚君來
召我我將安居比戚之欲仕也管仲大悅以報桓公
遂相齊

居燕子樓 關盼盼張建封侍姬也建封歿盼盼獨居
燕子樓十餘年一日得白樂天和詩泣曰自我我公
薨妾非不能死恐世以我公重色有從死之妾而玷
公也遂怏怏不食而卒但吟云兒童不識冲天物漫
托青泥污雪毫

何惜一女 周顛母姓李字絡秀顛父浚為安東將軍
出獵遇雨過李氏會其父兄他出絡秀與一婢具數
十人饌甚精辦而不聞人聲浚恠使人覘之獨見一
女子美甚浚固求為侍妾父兄初不許絡秀曰門戶
衰微何惜一女遂許之生顛及嵩

抱骨赴水 趙淮妾長沙人元將使淮招李廷芝淮至

城下大呼曰廷芝男子死耳無降也將怒殺之攜其
妾妾偽告曰將妾夙事趙運使今死不葬不忍忘情
願往埋之即事公無憾乃聚薪焚准骨置缶中自抱
骨赴水死

察妾憂色 袁昇五旬無子往臨安置妾既得妾察其
有憂色問故妾曰吾故趙太守女也家四川且貧母
賣妾為歸葬計耳昇即送還并傾橐以贈妻曰君施
德如此何患無子次年生韶為浙西使孫洪官郡司
馬

不如降黃巢 王鐸鎮渚宮以拒黃巢兵漸逼先是赴
任多帶姬妾夫人不知忽報夫人離京在道謂從事

曰黃巢漸自以南來夫人又自北至旦日情味何以安處幕僚戲曰不如降了黃巢

諷使出妻 宋夏執中姊為孝宗后累官節度初執中與其微時妻至京后諷使出之擇配貴族執中誦宋弘語以對后遂止

六十未適 南北朝顧協少時將聘舅女未成婚而母亡免喪後不復娶至六十餘此女猶未他適協義而迎之卒無嗣

遺妾獻詩 陳陶操行高潔累辟不起嚴譔守南昌欲試之遣小妾蓮花往侍陶竟夕不納妾獻詩曰蓮花為號玉為腮珍重尚書遣妾來處士不生巫峽夢空

勞雲雨下陽臺陶答云近來詩思清於水老去風情
薄似雲已向昇天得門戶錦衾深愧卓文君

計賺解後 沈襄父鍊疏劾嚴嵩父子被謫復誣入白
蓮邪教戮之原籍逮襄部訊并解其妾抵山東起早
下於客店妻密告語襄曰君至京必無生理盍以計
脫以存宗祧妾拚一死與之圖賴或得免落奸相之
手於是給之曰此地有吏部某為我父同年都在都時
曾貸我父三百餘金索來可作路費亦可以餘者贈
爾兩人為還鄉需不識可行否二羞羞以其有妾有
為買去其手刑易其衣中一差守妾於店一差押之
同往行不一里其羞腹疼登廁襄逸去羞至所謂吏

部家與襄所言迥異奔迴回客店云襄脫逃嚇妾吐
真妾乃號叫曰我夫妻耐苦到此京師已近滿望事
白生還汝受嚴氏囑潛殺我夫汝必還我夫屍我以
身殉決不甘孱弱女流又遭汝之污辱聞者酸鼻告
之當道亦疑為嚴氏所謀將妾寄養尼菴日比二差
還屍拖延二載嚴氏敗襄出為父陳克恩贈廕蒙贈
廕妾亦受封與襄白首告終

名分定矣 嘉靖己丑瑞州孝廉劉文光廖暹同上公
車皆下第欲歸廖倩媒買妾拉劉同往選擇相中一
女下定訂期其女問曰二位相公何者聘妾廖戲指
劉曰是這劉相公娶你劉亦大笑女乃對劉肅拜而

進次日備禮往娶女見儀狀大駭曰劉君娶我何以帖出廖某媒告以實女變色曰作妾雖然微賤亦關夫妻父子之道豈可輕指他人以為戲我已拜劉名分矣父母婉轉再四誓死不從廖追悔無及勸劉納之劉力不繼約以下料後劉正室逝世娶女為正

各送半臂 宋子京夜飲曲江偶寒命取半臂十餘寵各送一枚子京恐有去取不敢服冒寒而歸

白中炊釜 江淮王生善卜有賈客張瞻將歸夢炊白中間王生生曰君歸不見妻矣白中炊無釜也瞻歸而妻已卒

覆水難收 姜太公初娶馬氏讀書不事產業馬求去

太公封於齊馬求再合太公取水一盆傾於地令婦
收水惟得其泥太公曰若能離更合覆水豈難收

一壻

紅絲 唐郭元振美丰姿宰相張嘉貞欲納為壻曰吾
五女各持一絲於幔後子牽之得者為婦元振牽一
紅絲得第三女

廐中騏驎 南史杜廣初為劉景廐卒及與景語景大
驚曰久負賢者告其妻曰吾為女求壻二十年不意
廐中有騏驎遂以女妻之

屏間孔雀 唐高祖皇后竇氏父毅曰此女有奇相不
可輕許人因畫二孔雀於屏求婚者令射二矢陰約
中目高祖最後至各中一目遂歸於帝

玉鏡臺 晉溫嶠姑有女屬嶠覓壻嶠自有婚意曰但

得如嶠如何姑曰何敢希汝比也復一日嶠云已得
壻矣門第不減嶠因下玉鏡臺一枚姑喜婚畢姑女
披紗扇撫掌笑曰我果疑是老奴果如所卜

再娶小姨 歐陽公與王拱辰同為蕭簡肅公壻歐公
先娶其長拱辰娶其次後歐公再娶其幼女故歐公
有舊女壻為新女壻大姨夫作小姨夫之戲

東牀坦腹 郗鑒使門生求壻婚於王導導東廂下徧
觀子弟門生歸謂郗曰王氏諸子弟咸自矜持唯一
人在東牀坦腹卧食胡餅獨若不聞鑒曰此正佳訪
問乃羲之遂妻以女

快壻 後魏劉延明十四就博士郭瑀學弟子五百餘

人瑤有女選壻意在延明設一座曰吾有女欲覓一
快壻誰坐此者延明奮衣坐曰延明其人也瑤遂妻
之

乘龍 魏黃尚與李元禮俱為司徒俱娶太尉桓元叔
女時人謂桓叔元女俱乘龍言得壻如龍也

岳丈 青城山為五岳之長名丈人山故稱婦翁曰岳
丈又云秦泰山有丈人峯故秦稱泰山

嶽公秦水 歐陽永叔常云今人呼妻父為嶽公以秦
山有丈人峯呼妻母為秦水不知出何書也

冰清玉潤 晉衛玠妻父樂廣皆有重名議者以為婦
翁冰清女壻玉潤

天緣 蒙氏有女欲為擇配女曰王擇配非天婚也我
欲倒騎牛背任牛所之即嫁之王從其請至一委巷
牛側其角而入見一樵者女曰此吾婿也王怒絕女
一日婿問首飾是何物曰金也婿曰吾樵處甚多載
歸皆金磚王難之曰汝能作金橋銀路吾當來訪果
作以迎王王歎曰信天緣也後名其地曰轆角莊
門多長者轍 張負女孫五嫁而夫輒死平欲娶之負
曰平雖貧門多長者轍卒與之誠曰無以貧故事人
不謹

佳婿 康唐揚於陵補句容主簿時韓滉節制金陵揚
以屬吏謁滉異之謂其妻柳氏曰夫人欲擇佳婿無

有如楊主簿者遂以女妻之

翁壻登相府 范文正一見富弼器之曰王佐才也適
晏元獻謂文正曰吾一女煩君為擇壻文正曰必求
國士無如富弼者元獻妻之後弼與元獻共登相府
蓋異觀也

此必國夫人 宋馬亮知夔州時呂蒙亨為屬吏子夷
簡在馬亮一見許妻以女妻怒亮曰此必國夫人也
人服其鑒

兄弟附子姪

田氏紫荆 田真田廣田慶兄弟同居紫荆茂盛後議
分析樹即枯槁兄弟不復議分樹乃茂盛如故

昆玉 陸機陸雲兄弟二人生於華亭人比之崑岡出
玉因名昆玉

三間瓦屋 蔡司徒在洛見陸機兄弟住參佐廨中三
間瓦屋士龍住東頭士衡住西頭士龍為人文弱可
愛士衡長七尺餘聲作鐘聲言多慷慨

難兄難弟 陳元方子羣陳季方子忠各論其父功德
爭之不能決咨於太丘太丘曰元方難為兄季方難
為弟

手足 袁紹二子譚尚父死爭立治兵相攻王修謂曰
兄弟者手足也人將鬪而斷其右臂曰我必勝可乎
二子不從為曹操所滅

折矢 吐谷渾阿柴有子二十人疾革令諸子各獻一
箭取一箭授其弟慕利延使折之利延折之取十九
箭使折之利延不能折乃嘆曰孤則易折衆則難摧
若曹識之

尺布斗粟 淮南王與漢文帝兄弟徙蜀道死民謠曰
一尺布尚可容一斗粟尚可舂兄弟二人不相容
分痛 宋史晉王有病太祖親往視之自為灼艾晉王
覺痛太祖亦取艾自灼以分其痛

皆有文名 羅願兄顯 顯頡頏弟頽皆有名 朱熹特稱之

大小秦 唐秦景通與弟暉皆精漢書號大秦小秦凡治漢書者非出其門謂無師法

東帶未竟 劉璉歟弟璉嘗隔壁夜呼之璉下床著衣立然後應兄恠其久曰頃東帶未竟其操立如此

龍虎狗 諸葛瑾仕吳弟亮仕蜀弟誕仕魏時謂蜀得龍吳得虎魏得狗

棠棣碑 賈敦頤為洛州司馬洛人為刻碑市旁弟敦實又為長史洛人亦為立碑其側號棠棣碑

三張 晉張載博學能文章嘗作劔閣銘武帝命鵠之

劔閣弟協少有雋才為河間內史元亦嫻詞賦時號
三張

三魏 魏允中南樂人兵使王元美賞識之丙子秋試
元美偕同官飲使院戒閣吏曰小錄至非魏允中元
母傳鼓夜半鼓發相與譴叫已與其兄允貞弟允孚
皆舉進士時人號曰三魏

自縛請先季死 王琳年十餘歲父母俱亡遭亂鄉鄰
逃竄惟琳兄弟獨守塚廬號泣不去弟季出遇赤眉
將殺之琳自縛請先季死賊矜而放之

時稱四皓 徐伯珍少孤貧以荏葉學書杜門十九年
淹貫經史累召不出兄弟四人俱白首時稱四皓

人所難言 劉正夫官左司諫徽宗方究蔡卞獄正夫
入對引淮南斗粟尺布之謠上意遂解謂正夫曰兄
弟之間人所難言卿能及此不覺感動

俱九歲貢 宋王應辰年九歲以能誦九經作春秋語
孟義兼通子史貢於禮部後數年其弟應申亦九歲
貢禮部

一母所生 吳思達兄弟六人先以父命析居及父卒
泣告其母曰吾兄弟別處十餘年今多破產一母所
生忍使苦樂不均耶復共居

金友玉昆 辛攀父爽尚書郎兄鑒曠弟寶迅皆以才
識知名秦雍為之語曰五龍一門金友玉昆

相煎太急 曹丕欲殺其弟植植賦詩曰煮豆燃豆其
豆在釜中泣本是同根生相煎何太急

火攻伯仲 周顛弟嵩因醉詈其兄曰兄才不及弟橫
得重名然燭蠟投之顛顏色無忤徐曰阿奴火攻誠
出下策

姜被 後漢姜肱與弟重海重江各娶兄弟相戀不忍
別作一大布被寢則兄弟與共人稱其友愛

花萼集 李義山兄弟俱以文章著同為一集號李氏
花萼集

賈氏三虎 後漢賈彪兄弟三人並有高名而彪最優
故天下稱之曰賈氏三虎阿彪最優

二惠競爽 左昭公三年齊公孫窻卒晏子曰惜也子
旂不免殆哉二惠競爽猶可又弱一個姜其危哉

雙壁 陸暉與弟恭之並有時譽洛陽令見之曰僕已
年老幸覩雙壁

佳子弟 王右軍少時為從伯敦導所器常謂右軍曰
汝是吾家佳子弟當不減阮主簿

吾家麒麟 晉顧和族叔榮見其總角志氣不凡曰吾
此吾家麒麟與吾宗者必此子

我家龍文 北史楊愔幼聰慧絕人其叔奇之曰愔也
將相器常詔人曰此兒駒齒未落已是我家龍文更
十歲當求之千里之外

猶子 盧邁進中書侍郎再娶無子或勸畜姬媵邁曰
兄弟之子猶子也可以主後

千里駒 符朗符堅從兄之子堅常稱之曰吾家千里
駒也

烏衣子弟 晉王氏子弟多居烏衣巷一時貴盛人稱
之曰烏衣子弟

小阮 竹林七賢阮咸為阮籍兄子故稱小阮

大小王 東陽王承出守東陽多惠政弟幼亦東陽守
時朱异用事車馬填門魏郡申英指异門曰此中輻
輳惟勢是趨不能屈者大小王東陽耳

臣叔不痴 王湛雅抱隱德不知者以為痴兄子濟往

省見床頭有周易因共譚易剖析精微出濟意外乃
嘆曰家有名士三十年不知武帝嘗問濟卿家痴叔
死未對曰臣叔不痴又問誰比曰山濤以下魏舒以
上

芝蘭玉樹 謝玄為叔父東山所器重安常謂子姪曰
子弟亦何豫人事正欲使之佳玄曰譬如芝蘭玉樹
使其生於庭階耳

屐齒之折 謝太傅與客圍棋俄而謝玄淮上信至屐
書畢攝放床下了無喜色下棋如故客問之徐荅云
小兒輩遂已破賊既罷還內過戶限不覺屐齒之折
三桂堂 宋王之道剛直尚風節與兄之義之深同科

名顏其堂曰三桂嘗夢帝命之曰以爾有功當錄其
後子十人仕者九人

刻鵠類鶩 馬援戒其子侄曰龍伯高敦厚周慎吾願
汝曹效之杜季良豪俠好義吾不願汝曹效之效伯
高不得猶為謹勅之士所謂刻鵠不成尚類鶩也效
季良不得陷為天下輕薄子所謂畫虎不成反類狗
者也

析廉取肥 漢許武以二弟晏普未顯欲使成名乃析
產為三自取肥田廣宅二弟無後言人皆稱其克讓
晏普並舉孝廉武乃會宗人泣言析產故悉以田宅
歸晏普一郡嘆服之

兄弟感泣 何文溫淵知温州府民有兄弟爭財而訟者文淵判其狀曰祇緣花底鶯聲巧致使天邊雁影分兄弟感泣親睦

兄弟爭牛 張萇年汝南守郡有兄弟分一牛爭訟不能決者萇年賜以已牛一頭使均之于是境中相戒咸敦敬讓

翁和堂 韓祥與弟補同登進士俱以德行文章顯名宋理宗書翁和堂以賜之

弟請抵罪 唐陸南金官太子洗馬嘗匿盧崇道捕當重法弟璧請抵罪御史恠之璧曰母未葬妹未歸兄能辦之我生無益不如死御史義之並免

兄惟一子 許荆兄子世嘗報仇殺人怨者操刃攻之
荆跪曰世無狀咎在荆兄惟一子死則絕嗣荆願代
之怨家曰許掾郡中賢者吾何敢犯遂委去

急即撲殺 李勣疾子弟固以藥進勣曰我山東田夫
爾位極三台年將八袞非過分耶命置酒奏樂列子
弟謂弟弼曰我見房杜諸公苦作門戶為後人計並
遭癡兒破家我有如許狔犬將付汝若不率教急即
撲殺

嫂叔

夏羹 漢高祖微時至丘嫂家嫂方食羹厭叔至陽云
羹盡轉釜已而視釜有羹由是怨嫂後乃封其子為
夏羹侯

為叔解圍 謝道韞適王凝之叔獻之與客議論詞理
屢屈道韞遣婢白獻之為小郎解圍乃于帳後與客
辯議客愧服而去

亦食糠覈 陳平家負郭窮巷以敝席為門或謂平曰
何食而肥嫂曰亦食糠覈耳有叔如此不如無有伯
聞而逐其婦

嫂不為炊

蘇秦出將大困而歸妻不下機嫂不為炊

及為從約長佩六國相印秦之妻嫂側俱目不敢仰
視俯伏侍取食秦乃笑謂嫂曰何前倨而後恭也嫂
委蛇蒲伏以面掩地而謝曰見季子位高而金多也

姊妹

聶政姊 聶政刺韓相俠異累因自皮面抉目自屠出
賜韓人暴屍購其名其姊往哭之曰是軼深井里聶
政也以妾在故自刑以絕其跡妾敢畏死以氓賢弟
之名遂死於政之旁

屈原姊女嬃聞屈原放逐來歸喻令自寬鄉人冀其見
從因名曰姊歸故離騷云女嬃之娟娟兮申申其詈
予

李勣姊 康唐李勣性友愛其姊病嘗自為粥而燎其
髮鬚戒止之答曰姊且疾而勣且老雖欲進粥尚幾
何

班超妹 漢曹壽妻曹大家聞超在絕域妹為上書乃

徵超還

宋太祖姊 趙匡胤將北征聞軍中欲立點檢為天子
告走家人太祖姊方在厨引麩杖逐之曰大丈夫臨
大事可否當自決乃來恐赫婦女耶太祖即趨出

姚廣孝姊 姚廣孝以靖難功封榮國公謁其姊姚嬭

姚嬭闔門揮麾出之曰做和尚不了豈是好人終拒
不見

駱統姊 駱統值歲饑減食姊問故曰士大夫糟糠不
足我何心獨飽姊助粟若干統一日散盡

李變姊 固女聞父危泣曰李氏滅矣密遣弟變詣父門

生王成而告之曰君執義先公有古人之節今以六尺委君李氏存滅在此矣遂服變服入成徐而成賈卜於市陰相往來比變赦還姊因相對而慟因戒之曰先公正直為漢忠臣雖死之日猶生之年慎勿以一言加梁氏聞者悲感

李宗妹 季兒者李宗之妹任延壽之妻也延壽怨李宗而陰殺之赦免季兒振衣求去延壽曰汝其殺我季兒曰殺夫不義事兄之仇亦不義與子同枕席而殺吾兄又縱兄之仇何面目戴天履地乎乃告女曰吾義不可留又無所往汝義善視兩弟遂自經

師徒 先輩

北面 唐崔日用請武甄言春秋疑義甄條舉無留語
日用曰吾請北面

函丈 禮若非飲食之客則布席席間函丈

夏楚 夏與楨同山楸木也楨形圓楚形方以二物為
朴以警其惰慢使之收斂威儀也

解頤 漢匡衡深明經術諸儒為之語曰無說詩匡鼎
來匡說詩解人頤

絳帳 漢馬融教授諸生常有千數坐高堂施絳紗帳
前授生徒後列女樂

負笈 漢蘇章負笈尋師不遠千里

立雪 游酢楊時為伊川先生弟子一日侍先生側先生隱几而卧二生不敢去候其寤則門外雪深尺餘矣

坐春風中 朱公琰名光庭見明道先生於汝州歸語人曰光庭在春風中坐了一月

舌耕 漢賈逵通經來學者不遠千里廣有贈獻積粟盈倉或云逵非力耕乃舌耕也

牧豕 後漢孫期少為諸生通京氏易古文尚書家甚貧牧豕於澤中學者皆執經壟畔以追隨之

白首北面 賈瓊曰文中子十五為人師陳留王孝逸先達之傲者矣然而白首北面豈以年乎

人師難遭 董子魏照求入事郭林宗供洒掃林宗曰
當精義講書何來相近照曰經師易獲人師難遭欲
以素絲之質附近朱藍

青出於藍 荀子學不可已青出於藍而青於藍冰出
於水而寒於水

師何常 北史李謚初師事孔璠璠後璠還就謚請業
同門生語曰青成藍藍謝青師何常在明經

一字師 張詠詩云獨恨太平無一事江南間殺老尚
書蕭楚才曰恨字未妥宜改幸字詠曰子吾一字師
也

東家上 漢邴原就學於孫松菘曰子近捨鄭君鄭玄

而躡屨至此豈以鄭為東家丘耶原曰人各有志所向不同君謂僕以鄭為東家丘則君以僕為西家之愚夫矣松謝家語孔子西家有愚夫不識孔子為聖人乃曰彼東家丘吾知之矣

吾道東 漢鄭玄事馬融學有得及辭歸融喟然謂門人曰吾道東矣

吾道南 宋楊龜山師明道先生及歸送之出門謂坐客曰吾道南矣

易已東 漢卜寬學易於田何學既有成寬東歸何喜謂弟子曰吾易已東矣

關西夫子 後漢楊震明經博覽為諸儒所宗號曰關

西夫子

南州闕里 兗州曲阜縣闕里孔子所居之地朱熹居

建陽有考亭明經論道諸子士號南州闕里

教授河汾 晉王通教授於河汾之間弟子自遠至者

甚衆累徵不起趙郡李靖清河房玄齡鉅鹿魏徵一

時王佐之才皆出其門

師友淵源 古人學問必有淵源楊惲一 迥出當時

流輩則司馬遷外甥也

吾道之託 黃榦字直卿朱熹曰直卿志堅思苦與之

處甚有益遂以女妻之熹病革出所著書授榦曰吾

道之託在此

此吾老友 蔡元定八歲能詩及長登而山絕頂日惟
啖薺於書無所不獨讀朱熹扣其學大驚曰此吾老
友也不當在弟子列

通家 孔融年十歲聞李膺有重名造之膺問高明父
祖常與僕周旋乎融曰然先君孔子與君家老子同
德比義而相師友則融與君累世通家也

父執 曲禮曰見父之執 執父同志之友也 不謂之進
不敢進不謂之退不敢退不問不敢對

識荆 李白與韓荆州書曰白聞天下談士言曰生不
用封萬戶侯但願一識韓荆州何令人之景慕至此
哉

山斗 韓昌黎以六經之文為諸儒倡自愈歿後其學盛行學者仰之如泰山北斗

函關紫氣 老子將度函谷關關吏尹喜望見尹紫氣神知有神人來果見老子騎青牛薄板車過關喜拜之老子教喜煉氣授以道德五千言

倒屣 蔡邕聞王粲在門倒屣迎之粲至年既幼弱容貌短小一座盡驚邕曰此王公孫有異才吾不如也吾家書籍文章當盡與之

下榻 徐穉字孺子豫章人陳蕃為豫章太守罕所接見惟設一榻以待孺子去則懸之穉屢薦不仕郭林宗稱為南州高士

御李 李膺性簡尤無所交接荀爽常謁膺因為其御
既還喜曰今日乃得御李君

李郭仙舟 郭泰游洛陽與河南尹李膺相友善後歸
鄉里衣冠送至河上車騎數千泰與膺同舟而濟眾
賓望之以為神仙世稱李郭仙舟

北海樽 孔北海性寬容好客及退閒職賓客日盈其
門常歎曰座上客常滿樽中酒不空吾無憂矣

千里命駕 晉呂安服嵇康高致每一相思輒千里命
駕赴之

高軒過 李駕賀七歲能文韓愈皇甫湜過之賀作高
軒過詩以謝之

投轄 漢陳遵每大飲賓客滿堂輒閉門取客車轄投
中雖有急不得去

附驥 公孫述傳蒼蠅之飛不過數步附托驥尾得以
絕羣

披雲 晉衛瓘見樂廣竒之命子弟造烏曰此人冰壺
濯魄見之瑩然若披雲霧而覩青天

景星鳳凰 韓愈遺李勅書曰朝廷士引領東望若景
星鳳凰始見爭先覩之為快

鄙吝復萌 漢黃憲陳蕃嘗謂周舉曰旬日間不見黃
叔度鄙吝之私復萌於心矣

朋友

莫逆 子祀祀子輿子犁子來四人相與語曰孰知死生存亡之一體吾與之友矣四人相視而笑莫逆於心相與為友

友道君逆 周宣王將殺其臣杜伯而非其罪伯之友左儒爭之於王九復之而王不聽王曰汝別君而異友也儒曰君道友逆則順君以誅友友道君逆則順友以違君王殺杜伯左儒死

傾蓋 孔子之郟音談國名遭程子於途傾蓋而語終日甚相浹洽顧謂子路曰取束帛以贈先生

雷陳 後漢雷義與陳重為友義舉茂才讓於重刺史

不聽遂佯狂被髮走不應命鄉里為之語曰膠漆雖謂堅不如雷與陳

僑札之好 李札見鄭子產如舊相識與之縞帶子產獻紵衣後稱交契者謂之僑札之好

杵臼定交 後漢公孫沙穆游太學無資糧乃變服容傭為吳祐賃舂祐與語大驚遂定交於杵臼之間

刎頸交 陳餘年少交事張餘耳兩人相與為刎頸之交後乃有隙

如飲醇醪 程普嘗以氣凌周瑜瑜未嘗有愠色承奉愈謹普自慙投分於瑜曰與公瑾交若飲醇醪不覺自醉

廉慶 廉范與洛陽慶鴻為刎頸交時人稱曰前有管
鮑後有廉慶

管鮑分金 管仲與鮑叔相友善仲曰吾困時嘗與鮑
叔賈分財則吾多自與鮑叔不以我為貪知我貧也
生我者父母知我者鮑叔也

停雲 陶元亮詩敘停雲思親友也故稱知交謂之停
友

舊雨言舊交也杜工部云卧病長安旅次多雨尋常車
馬之客舊雨來新雨不來

題鳳 嵇康與呂安善後安來值康不在嵇喜延之不
入題鳳字而去喜以告康康曰鳳字凡鳥也

指困 魯肅以散財賑窮結交後傑周瑜過肅并告資
糧肅家有兩困米各三千斛肅乃指一困與瑜瑜驚
異之遂相與親結

彈冠結綬 王吉與貢禹為友肅育與朱博為友交相
薦達長安人語曰王貢彈冠肅朱結綬

更相為僕 宋韓億李若谷未第時俱貧赴試京師僅
有一氈一席割分之每出謁更相為僕李先登第韓
為負箱至長社分餞而別後韓亦登第

爾汝交 彌衡逸才飄舉少與孔融作爾汝交時衡未
滿二十而融已五十敬衡才秀共結殷勤

忘年交 張鏗有重名陸贄年十八往見語三日奇之

稱為忘年之交

金蘭簿 戴弘正每得一密友則書於簡編焚香以告
祖考號金蘭簿

三友一龍 華歆與邴原管寧相善時號三友為一龍
謂歆為龍頭原為龍腹寧為龍尾

雉壇 五代時三人為朋築壇以丹雉白犬歃血而盟
曰卿乘車我戴笠他日相逢下車揖我步行卿乘馬
他日相逢馬當下

總角之好 孫策曰公瑾與孤有總角之好骨肉之分
耐久朋 唐魏元同與裴炎締交能保終始時人號為
耐久朋

平生歡 後漢馬援與公孫述同里聞相善以為當握
手歡如平生

青雲交 江淹曰袁叔明與我有青雲交非直銜杯酒
而已

班荆 楚聲子與伍舉相善遇之鄭郊布荆於地共食
而言也

范張雞黍 范式張邵為友春時京師作別式曰暮秋
當拜尊堂至期邵白母殺雞以俟母曰巨卿相拒千
里前言戲耳邵曰巨卿信士言未畢果至升堂拜母
盡歡而別

繫劍冢樹 季札出使過徐徐君好秀季札劍口不敢

言季札知之使上國未獻還至徐徐君已死乃解劍繫其冢樹而去季札交情不以死生易念

生死月骨 蓬子馮曰吾見申叔夫子所謂生死而月骨者也敢忘報哉

口頭交 孟郊詩古人形似獸皆有大聖德今人表似人獸心安可測雖笑未必和雖哭未必戚但結口頭交肚裏生荆棘

交若醴 莊子君子之交淡如水小人之交甘若醴君子淡以親小人甘以絕

貧交行 杜詩翻手作雲覆手雨紛紛輕薄何須數君不見管鮑貧時交此時令人棄如土

面朋面友

顏克誌面交如攜手見利即解攜而去也

楊子曰朋而不心面朋也友而不心面友也同類

曰朋同志曰友

絕交惡聲

燕樂毅書古之君子交絕不出惡聲忠臣

去國不潔其名

五交

劉孝標廣絕交論謂勢交論交窮交量交賄交

此五交皆不能恤貧故絕之也

識半面

漢應奉嘗詣袁賀賀閉半戶出半面視奉奉

即去故與人曾相見者曰識半面

無逢故人

公孫弘食故人高賀脫粟飯覆以布被賀

曰何用故人富貴為脫粟布被弘內廚五鼎外膳一

殺詐也弘曰寧逢惡賓無逢故人

懷刺漫滅 彌衡尚氣剛傲自荆州北游許都書一刺
懷之字滅而無所遇或曰何不從陳長史者為達乎
衡曰君使我從屠沽兒輩耶

負荆請罪 藺相如為趙上卿位在廉頗右頗曰我見
相如必辱之相如望見頗引車避之左右以為恥曰
強秦不敢加兵於趙者以吾兩人耳今兩虎相鬪勢
不俱生吾先國家之急而後私讐頗聞之肉袒負荆
至門謝罪

翟公書門 鄭當時傳翟公為廷尉賓客填門及廢門
外可設雀羅後復為廷尉客欲往翟公大書其門曰

一死一生乃見交情一貧一富乃知交態一貴一賤交情乃見

布衣交 李孔修自號抱真子混迹闖闖人莫之識陳獻章見之曰此非俛首當世人也平居冠管寧帽衣朱深衣惟攻周易一日輸糧至縣令異其容止問姓名不答第拱手令叱曰何物小民乃拱手耶再拱手令怒咎之五竟無言而出令疑焉徐得其情乃大敬禮之吳廷舉藩臬於粵引為布衣交卒無子尚書霍韜葬之西樵山

呼字定交 服虔字子慎善春秋聞崔烈集門人都講乃匿姓名負諸生作食每當講時竊聽稍共諸生敘

其短長烈疑是度早往及未寤便呼子慎子慎度不
覺驚應遂定交

死友、羊角哀左伯桃往楚道遇雪席不能俱生乃併
衣與角哀伯桃入樹死角哀至楚為大夫王備禮葬
伯桃角哀自殺以殉

奴婢

紀綱之僕 左傳晉侯迎夫人嬴氏以歸秦伯送衛于
晉三千人寔紀綱之僕

漁童樵青 唐肅宗贈高士張志和奴婢二人志和配
為夫婦名曰漁童樵青人問其故曰漁童使捧釣收
綸蘆中鼓柁樵青使刈蘭薪桂竹裏煎茶

海山使者 晉陶侃家僮百餘人惟一奴不喜言語嘗
默坐侃一日出郊外奴執鞭隨胡僧見而驚禮之曰
海山使者也侃異之至夜失其所在

讀書婢 鄭玄家奴婢皆讀書一婢不稱指玄使人曳
跪泥中須臾一婢問曰胡為乎泥中曰薄言往愬

彼之怒

慕其博奧 蕭穎士性褊無比畜一傭僕杜亮每一決責便至力殫亮養創平復為其指使如故或勸之去答曰豈不知但慕其博奧以此戀戀不能去耳

溫公二僕 司馬溫公家一僕三十年止稱君實秀才蘇學士來謁聞而教之明日改稱大丞相溫公驚問僕實告公曰好一僕被蘇東坡教壞了 溫公一日過獨樂園見舡一廁屋問守園者從何得錢對曰積游賞者所得公曰何不留以自用對曰只相公不要錢

臧獲 海岱之間罵奴曰臧罵婢曰獲蓋古無奴婢犯

事者被臧沒入官為奴婦女逃亡獲得者為婢

措大 奴僕之稱有曰廝養有曰倉頭有曰盧兒有曰奚童有曰鉗奴有曰措大措大者以其能舉措大事也

開閣驅婢 王處仲嘗荒恣於色休為之疲左右諫之曰吾乃不覺耳如此甚易乃開後閣悉驅諸婢出任其所之

追婢 阮咸先幸姑家婢及居母喪姑當遠徙竟將婢去咸借客驢著重服自追之累騎而返曰人種不可失婢即阮孚之母

銀鹿 唐顏真卿家僮名曰銀鹿歐陽公云銀鹿鼎

便了 漢王子淵名褒從成都楊惠買夫時戶下有

髯奴名便了決賣萬五千與立券約從百使役

長鬚赤脚 韓愈寄盧仝詩云玉川先生洛城裏破屋

數間而已矣一奴長鬚不裹頭一婢赤脚老無齒又

東坡云常呼赤脚婢雨中擷園蔬

掌箋婢 康唐潞州節度使薛嵩有侍侍婢紅線嵩使

掌箋表號內記室

吹篴婢 後魏河澗王有婢曰朝雲善吹篴諸羗叛王

使朝雲假為姬吹篴羗皆流淚思鄉而去

桃葉 晉王獻之愛妾名桃葉嘗渡秦淮口獻之作歌

送之今名曰桃葉渡 獻之有歌曰桃葉復桃葉渡江

不用揖但渡無所苦我自來迎接

雪兒歌 唐李密寵姬名雪兒每賓客有辭章寄麗者

付雪兒協律歌之故號雪兒歌

絳桃柳枝 韓退之二侍姬名絳桃柳枝退之初出使未歸柳枝竄去家人追獲及鎮州有云別來楊柳街頭樹擺亂春風只欲歸惟有小桃園裏在柳花不發侍郎回自是專屬意絳桃

樊素小蠻 白樂天兩婢一名樊素一名小蠻有云櫻桃樊素口楊柳小蠻腰

瓦刺輝明太祖駙馬梅殷僕也譚深趙曦謀殺駙馬文皇帝殺此二臣反刺輝取心肝以祭駙馬痛哭而死

仆地潑毒酒 衛國主父為周大夫不歸者三年且

巫氏與人通一日主父回其妻慮事敗以毒酒飲

命婢葵枝行酒葵枝知其謀而忖曰從主母而殺主人不可謂義受主母托而破其狀則害主母不可謂忠乃故仆于地而潑其酒主父反以婢為不敬而重責之葵枝受而不怨

李元蒼頭 李善漢李元之蒼頭也元盡室疫死惟孤

兒續始生數旬而貲財巨萬諸奴欲謀續分其財善潛以續出亡隱瑕丘界中親自乳哺及長訴叛於官奴於官悉殺之時鍾離意為瑕丘令上書以聞光武拜善及續並太子舍人善還舊里脫冠解帶掃元墓

門修祭泣數日乃去

定國侍兒 王鞏字定國坐蘇軾黨貶賓州軾臨北歸

別鞏出侍兒柔奴進酒軾問柔奴嶺南應是不好柔
如奴曰此心安處便是吾鄉軾因作定風波一詞以
贈